

四庫全書

集部

欽定四庫全書

集部

元詩選初集卷六十一

詳校官中書臣

王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣楊潤

欽定四庫全書

元詩選初集卷六十一

庶吉士顧嗣立編

最閒園丁王逢

逢字原吉江陰人弱冠有文名至正中嘗作河

清頌行臺及憲司交薦之皆以疾辭世居江上

之黃山自號席帽山人避地無錫梁鴻山未幾

遷松之青龍江名所寓曰梧溪精舍自號梧溪

子蓋以大母徐嘗手植雙梧于故里之橫江志

不忘也又徙上海之烏涇築草堂以居曰最閒園自號最閒園丁明初以文學錄用其子通事令掖以父老泣請命罷之年七十卒洪武戊辰歲也有梧溪詩集七卷選家于列朝詩集載之前編謂原吉當張氏據吳大府交辟堅卧不就而又稱其為張氏畫策使降元以拒臺此何說也張士德之敗在丁酉三月其時張氏尚未降元也而謂其于楚公之亡有餘恫焉未知其為

元乎抑為張氏也原吉一老布衣沐浴于維新
之化者二十年其子已通仕籍矣而謂其故國
舊君之思至于此極西山之餓洛邑之頑未知
其又何所處也選家好為曲說至引謝皋羽掣
眉公為喻抑何其不相類乎然原吉之詩志在
乎元則成其為元而已矣故附于遺民之例而
錄之

虞美人行贈邵倅

大王氣蓋世力拔山七十餘戰龍蛇間得人為霸失人
虜有妾如花無死所夜寒蒼蒼星月高不惜傾身帳中
舞大王恩深淺東海青血熒熒春草在當時早化劍雙
飛四面楚歌那慷慨芒碭山開五色雲雌雉竟與雄鷩
羣嗚呼後世亂紛紛非君擇臣臣亦當擇君

危腦帽歌讀五代前蜀史有感而作

白兒羅青衲襖金鴉翠翎七寶飾圓方反正無定式國
人戴之天下惜後宮如花醉妝美君王無心冠帶理大

木晝拔貪狼風猶汎樓船濟江水承平禮樂亦草草豈
但當時帽危腦可憐來者忘喪元紅纓未亂如雲擾君
不見玉帛萬國先王朝會弁如星麗九霄鳳凰麒麟在
郊輶夔龍前殿奏簫韶

天門行

天門高高俯四極寸田尺地登版籍澤梁無禁漁者多
瀚海橫戈恣克斥去年官饟私寇攘今年私醢官價償
屠燒縣邑誠細事大將不死鯨鯢鄉

謂博羅特
穆爾左丞

烹羊椎

牛醉以酒腰纏白帶紅帕首定盟歃血許自新禦寇征
蠻復何有國家承平歲月久念汝紛紛迫餬口羽林堅
銳莫汝撓慎勿輕誇好身手春風柳黃開陣雲號令始

見真將軍

博羅特穆爾討方國真兵敗被
執為求招安至正辛卯歲也

銀瓶娘子辭

并序

娘子宋岳鄂王女聞王被收負銀瓶投井死祠

今在浙西憲司之左逢感其節孝敬為之辭

蒼梧月落烏號霜寒泉幽凝金井牀綺疏光流大星白

夢驚萬里長城亡女郎報父收囹圄匍匐將身贖無所
官家聖明如漢主妾心愧死緹縈女并臨交衢下通海
海枯衢遷井不改銀瓶同沈意有在萬歲千春露神采
魂今歸來風冷然思陵無樹容啼鵑先王墓水西湖邊
任月山少監職貢圖引

好風東來快雨俱夫須亭觀職貢圖厥長高鼻深目胡
冠挿翟尾服繡襦革帶鞮屨貂襜褕左女執盞右執壺
手容恭如下大夫厥妻髻椎將湛盧五采雜珮相縈紆

轉顧飛虎飛龍旗鏤耳者殿帕首驅瓔珞袒跣兩侏儒
一檠木難珊瑚株一戴玉琢狻猊鑪神髮髻狀乳貙
復誰牽之鬢髮鬚最後我弁飾寶珠若將入朝謹進趨
禿奚踉蹌亦在途錦膊驄帶汗血駒尊貴卑賤各爾殊
經營意匠窮錙銖唐稱二閭道元吳今也少監稱京都
少監材抱豈畫史禹跡曾為帝親理河伯川后備任使
無支祈氏甘胥靡大德延祐貞觀比輦陸航海填筐篚
鳥言夷面遠能通少監臨古不無以趙公商公暨高李

頡頏霄漢嗟已矣
霽雲曙開儼斧戱
包茅不入頡誰訾
周編大書王會禮
安得臣臣奉天紀
陋儒作歌歌正始

淮安忠武王箭歌題垂虹橋亭

淮王昔下江南城
萬竈兵擁雙霓旌
錦裘繡帽白玉帶
金戈鐵馬紅鞶纓
阜鵬羽箭三十六
一一插向魴魚簞
鹿麕晝號猿抱木
王師所過全生育
彤弓親授聖天子
弓影射入東吳水
水波恍浸銅柱標
仰見浮屠半霄起
王當是時戢武功
指顧草樹生春風
宋家降璽朝莫得

思罷貫革垂無窮浮屠上層龍所宮寶盤紺碧蓮花同
弦張滿月報騶發忽露半竒薌雲中鏡歌啁轟鼓笳競
父老頓足驪聲應泗州使返睢陽亡漢關將入天山定
兩賢成敗闕衰盛雄材逸氣王誰並我浮扁舟五湖興
載拜何由重安靖猛士經過合深省

揚子舟中望鵝鼻山時聞黔南消息

山環芙蓉城私怪鵝鼻狀奔濤鎖長薄大石山名凜相抗
勢雄千軍壘氣寇萬鍾藏草樹春不蕃莓苔滑難傍剛

風過靈雨復值桃花漲破暝鷗鷺盤乘陰龍魚王飄鼓
一葦間攬之膽增壯謝安晉元臣豈跼江海量蒼生方
顛連其敢遂疎放黔陽百粵地黃霧吹虎鬚再觀神秀
姿不止西北向焞焞蒼精出閃閃白月漾三叫馮夷宮
吾奚獨惆悵

題烈女廟

并序

女何江陰人少有容操五季時避亂前湖舟中賊
持兵犯之何泣曰吾身墮汝手肯從吾禱之于天

于父母乎賊由是少懈何乃起立且拜且祈乘間
竟投水死後里父夢見何曰吾當血食此地伺湖
成田則廟貌祀我既而果然今廟在華藏寺南郡
志所載略異逢蓋得先大母所傳云

遺廟湖陰四百年斑斑江竹映嬋娟魚龍水落荏蒲外
鷄犬村成壓柘邊不待清名垂女史尚存貞魄降神弦
君王社稷今焉在伏臘粢盛自儼然帷箔夜涼臨月榻
珮環晨響起雲輶湘靈鼓瑟虞風盛蔡琰聞笳漢鼎遷

嗟彼生還羞故國何如死節報皇天明妝靚服黃塵裏
重為傷時涕泗漣

錢塘春感六首

紫罽輶車從六龍盡隨仙曲度青空蒼山樓闕旃林裏
赤羽旌麾野廟中百姓未忘周大賚成都元有漢遺風
流鶯不管傷春恨衝落桃花滿樹紅

王氣凌虛散曉霞虎闥麟閣靜煙花中天日月迂黃道
滄海風雲冷翠華望帝神遊夔子國烏衣夢隔野人家

當時舉目山河異豈但紅顏泣塞茄

周南風俗漢衣冠五色雲中憶駐蹕
璽瓊檜高藏白獸蕊珠花發降文鸞
河通織女機絲溼雨歇巫娥翠黛寒
滿地吳山誰灑淚一江春水獨凭闌

日華初動袞衣明劔佩千官隱繡楹
五色黼函開玉座九重湯藥下銀罌
書題鳳尾仙曹喜恩浹螭坳學士榮
文化有餘戎事略銅駝草露不勝情

瑤池青鳥集觚稜白塔金鳧闕夜燈
雲母帳虛星采動

水晶宮冷露華凝
驪山草暗墟周業
鄙塢花繁失漢陵
白馬素車江海上
依然潮汐撼西興

金爵觚稜月向低
泠泠清磬萬松西
五門曙色開龍尾
十日春寒健馬蹄
紅霧不收花氣合
綠波初漲柳條齊
遺民暗憶名都會
尚繞湖濬唱大堤

讀謝太皇詔藁

半壁星河兩鬢絲
月華長照素簾垂
衣冠在野收亡命
烽火連營倒義旗
天地晝昏憂社稷
江淮春漲泣孤嫠

十行哀詔無多字落葉虛窻萬古思

讀國信大使郝公帛書

西北皇華早東南白髮侵雪霜蘇武節江海魏牟心獨
夜占秦分清秋動越吟蒹葭黃葉莫苜蓿紫雲深野曠
風鳴籟河橫月映參擇巢幽鳥遠催織候蟲臨衣攬重
裁褐貂餘舊賜金不知年號改那計使音沈國久虛皮
幣家應詠藁砧豚魚曾信及鴻鴈豈難任素帛辭新館
敦弓入上林虞人天與便奇事感來今

公羈旅日有以
鴈四十餉公內

一鴈體質稍異命畜之于後鴈見公輒張翮引吭而鳴
公感悟擇日率從者二十七人具香北拜二人舁鴈跼
其前手書尺帛親繫鴈足且致祝曰累臣某敢煩鴈卿
通信朝廷鴈其保重欲再拜鴈奮身入雲而去未幾虞
人獲之于苑中以所繫帛書託近侍以聞上惻然曰四
十騎留江南曾無一人鴈比乎遂進師南伐越二年宋
亡書今藏諸祕監河
南主客劉澹齋云

憶舊遊二首

醉酒高陽里題詩左氏莊碧雲垂草帶紅旭散花房流
水循除活飛絲拂鬢長座中誰潦倒遺却紫香囊

紫累妨過馬青苔委佩魚名通天上籍腹有架間書春

金匱要略卷六十一
水浮齋艦山雲落板車尚懷仁里好耕鑿對休居

題垂虹橋亭

長虹垂絕岸形勢壓東吳風雨三江合梯航百粵趨
對田連沮洳鮫室亂魚鳧私怪鴟夷子初心握霸圖

感宋遺事

五月無花草滿原天回南極夜當門龍香一篆魂同返

猶藉君王舊賜恩

至元十三年正月巴延丞相入杭二
月起宋三宮赴上都五月見世祖皇

帝尋命幼主為檢校大司徒封瀛國公十二日內人安
康朱夫人安定陳夫人二侍兒失其姓浴罷肅襟閉門

焚香于地並雉經死衣巾有清江紙書云不免辱國幸
免辱身不辱父母免辱六親藝祖受命立國以仁中興
南渡踰三百春躬受宋祿蓋為北臣大難既至守于一
貞焚香設誓代書諸紳忠臣義士期以自新丙子五月
吉日泣
血書

自乾封歸省祖壠過大南嶺向玉山

從親客殊鄉所忻塵事屏茲承有方役願言千里騁朝
辭縣北山午踰虛南嶺溼嵐沍浮陰高日下疎耿亂田
麥蕃撫絕壁松秀整登登復輿勞委委蘿徑永異跡辨
變足獨往見僧影冲襟暢寬曠玄趣集深靜丘墓躬汎

埽庭閑念定省僕夫戒期程烏啼復予警

復如乾封晚經漁浦

窮曠經漁浦寒水白于練總星東出獵獵風北轉
眼中獸蹄過笛裏魚狀變稍聞刁斗應漸喜煙火見誰家
長林根繫艇沙渚面天含瀟湘思山錯吳越甸承平謝
憂患少壯忘羈賤瓜橋往未遑雲源訪殊便明涉子陵
灘桂酒同一奠

敬題諭淮安朱安撫詔後

附詔文云大元皇帝聖
旨諭淮安州安撫朱煥

據陳楚容奏臣與朱安撫同年又有通家之好
自戊午歸順之後不相見者十有八載今王師
弔伐諸道並進數內一路領漣河清河將士攻
取淮東未附州郡竊恐城陷之日玉石俱焚臣
于古人情分不容緘默且彼所以嬰城自守者
無他原其本心但未知趨向之方初無執迷抗
拒之意今大江南北西至全蜀悉入版圖若蒙
聖慈特發使命宣示德音開其生路彼亦識時
遠變之士也寧不以數萬生靈為念乎臣昧死
上言伏候勅旨准奏今遣使特旨前去宣布天
信若能識時遠變可保富貴應在城守禦將帥
同謀歸順者意不殊此故茲詔示想宜知悉至
元十二年七月
月漢兒字書

九鼎沸莫止大厦傾莫支太陰初陽不得燭下土小龍

望望闔之陞六宮掩泣向北去孤臣憑城尚南顧也知
天命有所歸忍為生靈貸生路當時不死良為此至今
人說姜與李君家富貴八十年露臺風館啼猩鬼世事
茫茫難具論遺詔幸得傳諸孫烏絲細字書題罷黃葉
乘秋正打門

聽鄭廷美彈琴

畫闌月照芙蓉霜博山水暖薔薇香石屏石几青黛光
鄭鄉君子琴中堂榴裙蕙帶辭羅洞玉珮珠璫脫飛鞵

何處春深雲滿林，小巢並語梧花鳳。君不見湘靈鼓瑟，
湘江許苦竹祠荒，愁莫雨遺音一聽增感傷。使我無言重
懷古，重懷古鷄喔喔，明星爛漫東城角。誰家尚奏桑間樂，

婦董行

并序

婦董滕人劉進妻也。進與兄順並以勇稱。金季山東亂，盜蜂起，因共募丁壯保里閭。天兵駐嶧山，進單騎覘之中流矢死，順徙家淮南，舉室溺淮水。董為宋招撫呂文德裨將所獲，欲犯之，度不免，乃謂曰：夫喪不

遠家難薦臻一身流離婉在旦莫死生非我有願
將軍勿疑夜果生一男先是順已入濟州愬于石
太尉珪曰順有弟不幸没于敵其妻在孕為南軍
拘幽舟中萬一不得收遺息使弟為厲實順之罪
也惟明公是圖石為發步卒三百人跡其所往次
淮揚始知董所在陰使人偵之生子蓋三日矣及
見具道順意董悲感不自勝且救淚曰妾以姪不
得先夫死今幸不辱先所天使有後皆伯賜敢名

此子曰伯祐以志不忘遂抱授偵者目送數十步
投江以死至正五年秋進玄孫士行語其事於逢
逢高其節義作詩哀之

北軍南軍和議時兩壘對立龍鸞旗羣雄棋峙國瓦解
乃與婦董光門楣星辰錯亂風雲氣乾坤造就冰雪姿
渾家性命葬魚腹一舸涕淚隨鷗夷長眠自足為義鬼
後死只望予孤兒兒在腹中兵在目憶夫心頭臂消肉
日晝慘慘陰靈啼夜黑冥冥波浪觸馬駝磧遠暗塵土

鷄犬村空疎樹木
嶧山誰收白玉骨
蔡州地陷黃金屋
太尉前歸明主化
招撫姑存寡妻宿
羞看人面問消息
強通語笑寬羈束
伯順見義勇著鞭
銳士協力鋒爭先
道傍弩伏荆棘底
掌上珠還江海邊
將門有後傳世世
墓祭無所從年年
湘妃揜袂遡寥廓
漢女結珮窮幽玄
縞衣綦巾共縹緲
文魚赤鯁長周旋
脣亡未久齒亦喪
獨聞其風猶凜然
中原山河想如故
目斷幾點滕州煙
逢為是詩已士行
復述順一事尤卓卓
順既得伯祐以行時
董死事覺招撫發步卒
亟追之賴左右弓弩

手散去還白太尉甚義之處之麾下凡兩致太尉命
往覲太祖皇帝于魚兒泊之行營賜金幣鞍馬且命
撫循邢磁贊黃十餘城用寧謐上功受黃金符官昭
勇大將軍行右副元帥濟兗單州等處管民長官在
官十餘年士民翕服晚有子五人未老棄官以伯祐
襲其爵為奉訓大夫濟州管民長官是年至元元年
也故錄于詩後以
俟執史筆者采焉

簡黃大癡尊師

十年淞上籍仙關猿鶴如童守大還故舊盡騎箕尾去
漁樵長共水雲間吹笙夜半桃花碧倚杖春深竹筍斑
顧我丹臺名有在幾時來隱陸機山

過丘以敬管句吳山別業

梓潼祠畔敞林扉隱隱鷄聲落翠微
銅篆解將還省署銀魚忘却挂朝衣
石崖溜雨藤根白籬落緣雲瓠子肥
想見秋風遂高隱中原野馬正狂飛

奉題執禮和台平章丹山隱玉峯石時寓江陰

昭代優勲舊平章謝闔班堂開新綠
野玉隱小丹山曠晚文璫錯孚尹氣
往還崑丘玄圃畔台嶠赤城間不假
工琬琢元承帝寵頒靜容賓從仰明
燭鬼神奸秩禮均

恒岱謙光俯粵蠻儼持周勃節秀擁楚巫鬟樹錯珊瑚
朶苔封翡翠斑座裊聯綺轂車轂映朱殷或跂雙公鳳
時窺一白鵬爐香嵐勃勃簷雨瀑潺潺地縮三鰲島天
長九虎闕文饒淫翫好靈運癖躋攀日月由來繞風雲
不暫閒殷曾求傳說漢亦聘商顏金匱盟藏券青春詔
賜環皇基同永固國步罷多艱館閣題千首琮璜價百
鏤願移銘盛烈褒史著人寰

奉寄趙伯器參政尹時中員外五十韻

詔立淮南省符張閫外兵風雷朝煥發牛斗夜精明參
政材超偉元僚器老成武林多樹政禁籞舊蜚英鳳暖
文章蔚鯤秋羽翼橫天池今並奮嶰管後和鳴地要尤
膏沃時危必戰爭輔車依海岱衣帶限蠻荆玉葉開王
邸煙花匝子城萬艘鹽雪積千里稻雲平織貝殊珍粲
紅樓豔曲縈並緣胥狡黠貨殖駟驕盈汝稔初萌起河
流浸妄行鎮綏增屏翰贊畫授權衡愛稼須除滕憐牛
貴搏蟲式蛙曾霸主斬馬乃書生青汗三千牘丹心一

寸誠相臣連萬騎郡邑望雙旌
覽社湖移蚌綵絲井露
鯨里無安堵樂野有望塵
驚烏鹵煙侵燧孤嫠膽碎鉦
五賢迷古轍六詠歇新賡
瓦礫皆王土逋逃本爾氓
長驅勞組練盡埽愧橈槍
喻擬相如檄降懲白起坑
跋胡狼曷備毒尾蠆難撓
濟猛收神略疏恩渙虜情
佇聞鹿柵下莫作鬼方征
回鶻卑唐室天驕撓漢營
乾坤一羽扇社稷幾羊羹
杖杜交加影芙蓉裊娜莖
超然延爽笏肅若衛寒更
慮念真如是功勲孰與京
誓清懷晉遯虛

左慕齊嬰好定龍蟠價毋登狗盜名石洪重脣辟韓愈
建封迎故典何其盛斯文與有榮中州襟陝隴上國掖
幽并麟閣將來繪鷄壇宿昔盟芻蕘言慎擇葵藿義同
傾契闊商參恨栖遲畎畝耕小齋餘苜蓿四境半蕪菁
酒憶洎洎縹魴炊箇箇蘋悲歌垂短褐慷慨睠長纓親
病常憂懼身竒鮮弟兄君公終隱迹克國燁家聲楚角
關山晚吳陵草樹晴鶯知幽谷候鴈識大江程報政梅
全發封詩月迴清遙應語何遜開閣少陰鏗

贈別浙省黑黑左丞國寶自常州移鎮徽州三十
韻時歲癸巳

武德興元運文恬近百年一隅初難作四境遂兵連
奔朝元早彤弓授命專馮岑材並濟李郭駕爭先路
入延陵邑星分左轄躔著名黃閣上虛位紫宮前
汗血駒千匹跼跼士兩甄帳寒龍守劔城曙虎飛
旃跡埽齊門瑟身親楚醴筵慧山屏列野震澤鏡
涵天刁斗軍中堠鉏犂亂後田白無遺朽骨青有
續炊煙挿羽書閒署封

泥詔撫邊陣容催畫鼓
蠡氣動樓船舊政猶霜肅
新安素地偏
蜚精嘗感夢帝子或逢仙
漆葉雲羞密茶花雪妬妍
誦弦家櫛比冠蓋里班聯
鄒魯流風洽甌蠻習俗遷
比來疲賦斂況復值戈鋌
餽稍官曹待謳歌父老傳
挽屯吳幼節總體漢文淵
裴度歸休近羊公卧治便
鼎彝今燁赫韋布數周旋
小閣牛行炙長楸鵲試拳
王融五雜組孫武十三篇
華夏殘河汴神州歸薊燕
殄除纔蚺螭睥睨滿鯨鱣
狂斐言姑及高明義莫捐
憂君尚有

疏儻寄麥光牋

題沈氏別墅

小築洄塘上春陰水斂寒柳遮蓮葉艇花礙竹皮冠生
理尋常足閒心一寸寬知予厭奔走絕口不言官

壬辰冬十一月避亂綺山簡丘文中貢原父二教
授

雲掩金戈日風生鐵馬塵亂離誰事主貧賤獨為民鷄
犬人煙絕甍甍草木鄰喜聞同舍語天已厭荆榛

仙茅塢

夜宿仙茅塢金鼇湧亂山天風來海外煙火落人間白
石思同煮青蘿喜獨攀締衣弄華月公子亦忘還

登越城故基

吳王臺對越王城歲歲春風燕麥生一片范家湖上月
照人心事獨分明

和張率性經歷竹枝詞二首

溪上鵝兒柳色黃溪邊花樹妾身長浮藻可是無情物

采得歸來好遺郎

道傍花發野薔薇
綠刺長條絆客衣
不及沙邊水楊柳
葉間開眼望郎歸

無家燕

嗟嗟無家燕飛上商人舟
商人南北心舟影東西流
芹漂春雨外花落莫雲頭
豈不懷故栖烽暗黃鶴樓
樓有十二簾一一誰見收
衆雛被焚蕩雙翅亦斂
擘含情盼鬼蝶失意依
訓猴茅茨固低小理勢難
久留昔本烏衣

君今學南冠囚燕燕何足道重貽王孫憂

此詩為淮楚陷沒諸藩王

避難浮海而作

秋夜歎

大星芒鬣張小星光華開皇天示兵象勝地今蒿萊河
岳氣不分燭龍安在哉參贊道豈謬積陰故遲回疎風
夜蕭蕭野燐紛往來安知非遊魂相視白骨哀汨汨飲
馬窟雲冥望鄉臺于時負肝膽慷慨思雄材

積雨齋居

積雨生夏寒盛陰失朝景白鳥巢依閣青梧葉垂井幽
觀知候變遠引忘世梗淮水方浸淫吾甘繫煙艇

帖侯歌

并序

昌國州達嚕噶齊高昌特穆爾平章敏珠爾之猶子
也海寇犯境侯連與戰破之衆寡不敵或勸侯遁
去侯曰是吾死所也遂死之江浙省參政樊執敬
為文遣使致祭請謚於朝逢為作歌云

仙居縣丞寇海邦白晝突入干矛縱帖侯親騎大宛馬

快劍躍出蒼龍雙鬚張背裂赫如虎殺氣雄風助虓武
髑髏擲地血飛雨短兵未接寇偃鼓天南弧矢夜掩光
狼角赭赤雲玄黃洪濤鯨鯢去咫尺再戰身與城存亡
艤艫千百水犀手主者誰歟仆旗走岳立不轉鎩殺之
殉忠國家良亦厚君不見台州牧長金兜鍪氣節自是
名臣流情鍾兒女挫堅銳卒墮賊計空貽羞男兒真偽
那料得長松古柏寒增色鴻飛冥冥我何及落日荒山
淚橫臆

送宋宗道歸洛陽

選郎分手楚天涯萬里春明穩到家庭下已生書帶草
馬頭初見米囊花汴淮淅漫經梁苑星斗參差犯漢槎
中國未應風俗異舊京寧覺路途賒鮫宮獻珮當明月
鵲殿吹笙隱太霞貂敝世憐蘇季子賦成人哭賈長沙
若為撫事傷遺跡正用懷才待物華聞道鄉閭諸父母
杖藜期看馬卿車

毗陵秋懷

老兵為說劉都統起坐舟中思滿襟玄武城危寒日短
紫駝塵暗朔風臨江山不盡新亭淚天地長縣即墨心

宋祚未移中道死至今劒井蟄龍吟

泊常州城下有老
兵能道劉都統事

劉名師勇山東文安人至元十一年元師渡江過常州
知州趙汝鑒遁通判錢彬以城降師勇與都統王安節
殿師張彥克復之以姚嘗知州事安節出戰不利彥尋
以衆降師勇登埤拒戰攻圍五十餘日城陷嘗戰死安
節被執不屈死之師勇從八騎走所向披靡問道赴行
在扈二王入閩至紹興疽發背卒或曰國初吳城外僧
舍有一老僧長七尺許居十餘年未嘗面北坐人詰其
姓名輒不荅死之日僧聞其篋笥得師勇官誥豈其人
耶抑其騎士耶不可考矣

夜宴葉氏莊曉登悠然樓作

百尺飛樓俯碧湍六峯秀色繞闌干
杏花落盡東風惡燕子歸來社雨寒
夢裏香煙生繡幌酒醒紅蠟膩銅盤
一春樂意朝來好千里家書席上看

送朱自明辟閩憲奏差

閩中烏府小清都列郡山巒紫翠紆
王化直來天北極文星多聚海南隅
暖塵花氣隨驄馬春日榕陰滿鷓鴣
況有翰林持使節憲郎應得效馳驅

翰林指歐陽學士時除閩使

奉題先世所藏嚴子陵小像

千仞臺臨七里灘
羊裘鶴髮老魚竿
客星帝座分天象
潁水箕山並曉寒
遂起後塵甘黨錮
尚存餘烈愧南冠
桂叢莽蕝蘋花薄
悵望高風一羽翰

題馬洲書院并序

馬洲書院者孔聖五十二代孫元度昆季所建也
其五世祖若罕高抗不羣長于春秋當宋南渡自
闕里將之衢留滯泰興見河流達南江詢之老人

曰此龍開河也西北通淮泗因嘆曰吾洙泗龍泉之支流其在茲乎遂築室河上與其子端志各授弟子業從遊日衆乃有菑田百畝人助以力官復其稅戒子孫治生勿求富讀書勿求榮邑大夫嘉之易名龍開河曰敷教示崇化也年六十卒葬河之陽端志克守父道薦辟不就淳祐元年冬邑燬於北兵元虞避地是洲咸淳間書院落成教授復如初然皆無後今崇聖寺旁惟破屋蔓草遺像瓦爐而已逢懼變遷殆盡故敘其聚於

辟間庶後之起廢者得以考焉詩曰

蚪斗秦皆廢靈光魯獨存
豆籩漂海國丹牖暗淮村
苔蘚花侵礎蒲蘆葉擁門
青春深霧潦白日老乾坤
德化三王並威儀百代尊
郊麟初隱遁野兕遂崩奔
先輩俱冥漠諸生罷講論
斷編塵樹冷遺像網蟲昏
盡變衣冠俗終歸禮義源
江南遊學士瞻拜敢忘言

送郡知事李仲常還金華

列郡歌岑睭孤城頌李膺
文華仙掌露人品玉壺冰
畫

本黃荃學詩兼畢曜能關河千里道風雨十年燈薦鶚
知無忝登龍貴早承朔雲低紫禁東壁映青綾郎署新
帷幄儒門古豆登黿梁初隱見羽檄遂飛騰軍事諸曹
服元僚太守稱芙蓉秋獨卧驃騎日同興衆仰寬民力
誰堪作帝肱埽除塵瀕洞屏蔽雪侵陵野戍銷鋒鏑田
家罷棘矜昆侖天柱正宸極泰階升顧此心常切多君
興遠乘崇桃紅霧斂豐草綠波增喻蜀漢司馬歸吳張
季鷹宦情輕比蛻行色澹于僧三洞金晶發雙溪白練

激過家饒賞咏來紙細絨膝

塞上曲五首

木葉滿關河
轅門肅珮珂
將軍提劍舞
烈士擊壺歌
月黑輝銅獸
風高嘯紫駝
不堪城上角
五夜落梅多

將令傳中間
交驪決兩軍
地形龍虎踞
陣伍鳥蛇分
清野輝燕日
黃河瀉岱雲
生靈如有賴
絳灌不無文

月照小長安
風生大將壇
虎皮開玉帳
牛耳割銅盤
伯氣寒逾肅
軍聲夜不譁
皇天眷西顧
慎取一泥丸

絳革帶鉤膺聯鑣獵楚陵
白肥霜後兔青沒海東鷹
千里榛蕪闢三年稻穀登
中郎示閒暇呼酒出房烝
諸夏皇威立三邊虜氣衰
角弓分虎圈乳酒下龍墀
蠶午歆氛遠罷更窟宅移
與圖欲盡入中道勿頒師

聞武昌廬州二藩王渡海歸朝

茅土分封在金章渡海歸
事殊生馬角心愧著戎衣
星月晶光並山河帶礪非
秋風紫塞上依舊鴈南飛

和張率性推官小遊仙詞二首

西王春宴百娉婷玉碧桃花滿洞局自飲一杯瑤屑露
東風吹夢不曾醒

雲幢煙節紫霞裾齊御冷風集步虛若受人間塵一點
長門又屬漢相如

登雙鳳普福宮東樓贈吳道傳時周境存隱居同

席二首

道人獨坐覽輝樓海底青天入座流燕子飛來又飛去
遊絲挂在玉簾鉤

樓殿岩堯上赤霞水紋蟠鳳卧靈槎石棊盤靜香煙直
簾下雙頭百合花

望江郎石

仲春天氣佳萬象欣改色我行六峯外遙見江郎石二
儀闢混沌牽牛委晶魄鼎列台輔姿玉蘊珪璋德三神
浮瀛海噴薄東一極鉅鼇因戴之仙宮晃金碧斯連厚
坤軸乃棄姑筏域直上青蓮花或隕樵舍側安知非異
境自與三神敵于時攬深秀雲霧忽巾褱微風稍飄颻

空翠疑亂滴雜英敷陽豔嘉木生午寂交交黃鳥音好在千丈壁二年思晤對百里今咫尺煙波動落照道路陰已夕尚戀女媧功躊躇望西北

觀錢塘江潮時教化平章大讌江上

蒼蒼吳越山對峙東江腹江開白銀甕一浪天四蹴金晶王高秋風露氣轉肅當年駭壯觀委巷雷擊轂今年官增威旌麾被川陸羅衣繡龍鳳玉帶綠蠶粟牙牀錦屏帷蠻毯隨步蹙溫溫香卷陣婉婉眉闌綠微聞伊梁

音祿酒光動穀鮮醲片晌盡望姓空側目懼成庾郎哀

竊效杜陵哭冥頑鱗

一作鱣

魚彙屢覆舟萬斛梟雄扈將

軍

謂福建扈海元帥

竟作机上肉大浸交烽火血齒腥草木地

媼為之愁兼恐河源縮熟聞靈胥廟歲祭莫敢黷三叫

三酹觴願與赤水族錢王射强弩至今有遺鏃何當起

英魂少助八州督

時汝穎等州陷

中原日無事海寓蒙景福尚

虞多戕殘洒淚逃亡屋

往數名

一作陽明

開化二鄉掩骼

分藩多賢勞不敏忝賓客雖無官守縻亦復與言責二
鄉虔劉禍慘甚長平厄先王制禮經孟春當掩骼僕夫
有難色款段纔任策駸駸度岡坂眇眇循藪澤稍稍煙
微青歷歷野四白遊魂行草上遺老候道側我豈物役
徒茲來出心臆皇天久下憫赤子非寇敵鴟鳥何不仁
銜啄血更瀝因歌戰城南風悲淚狼籍

憂傷四首上樊時中參政蘇伯修運使

古青徐十連五屬桑棗墟黃河失經人化魚呂梁設險

豺為徒船多纔通玉帛貢車多始登牛馬途守無官軍

法度疎居無鉅室城隍虛欲去鹵掠當何如

合置官軍
合實郡縣

古青徐歲久致君心煩紆

竹笠黃

時有盜戴竹
笠拒官軍

黃金兜鍪勢相當兜鍪本居大將

壇左劒右印增威光邊隅將校望塵拜州縣曹佐聞風

僵況從元首授元柄稍忤言意違軍令不因蓄疫自焚

船那致生靈輕隕命竹笠黃兜鍪相當難走藏兜鍪豈

晚先戎行

欽定四庫全書

元詩選初集
卷六十一

官柳場青芒芒野鷹交飛撲馬驤年年十月轅門張元
戎始來坐虎牀翼舒箕哆魚麗行鼓進金退兵家常起
伏見譏孫武子句卒貽笑曹成王千夫散盡旌旗定偏
裨隊伍相呼應幾處私思誤主恩一回酒令行軍令酒
醉邊隅事不聞邊隅擾擾多煙氛

江海孺家家浮生多在船船居無租出無禁競賣田宅
行鹽錢私鹽漸多法漸密隩裏干戈攘白日尋常惡孽
不肯除本固枝蕃禍非一虎符龍節王者師赦過錄功

先自欺諫臣上疏效已晚蔓延及今歸咎誰地官合為
弘遠計鹽價減徵同賦稅盜源既清民瘼除五風十雨
歌康衢

小匕首歌

水精生苗月牙直彗芒披雲電流隙蟄蛇斷尾短草間
海鷗褪翎霜雪色宋斤魯削讓隋刻金錯錐刀豈其敵
吳鴻扈稽飛著體不曾為主開邊鄙嗟茲神物久泥滓
用之可以報國士簷冰卓筋日黯空稍玩股掌生雄風

鮫魚室卧縞帶影長鉞辟易萬雉墉古昔客堪秦王曾
幾仆翠鳳咸陽宮由來意氣泰山重命甘燎毛不旋踵
誰隳古制鑄小之佩稱衣冠加秘瑋我歌三嘆淚滿裾
曹轉豫聶無時無

客金陵遇有以茂才異等為薦者以病歸泊龍灣
二首寄丁仲容婁行所二先輩

柁樓醺酒出金陵病後衣裳體不勝風雨滿江寒聶聶
庭闈何處髮鬢髻周璆實下諸侯榻王式虛蒙博士徵

一曲離歌凝客思幾行疎樹隔漁燈

鳳凰臺上酒如川醉擬題詩李謫仙鑿齒已成耆舊傳
真長空覓孝廉船十年螢案書連屋八月龍灣浪拍天
無那病懷兼旅思白雲遙望夕陽邊

送于子實辟淮閬掾

淮海風高急鼓鼙潁州風起照淮西餽糈幾道通流馬
樓櫓重城望火鷄星入夜寒芒角動地連秋暝瘴氛低
君今掉鞅元戎幕肯慰流亡父老啼

宮中行樂詞六首

羽獵罷長楊宸遊入未央
鸞開雙畫扇鶴舞百霓裳
玉盞瓊花露金盤紫蔗霜
長門誰閉月流影在倉琅

望幸影娥池微吟紈扇詞
露盤迎月早宮漏出花遲
珮雜鑾和響雲連雉尾移
君王肯時顧從愛趙昭儀

明月窺彤管雙星直
罽宴分王母樂詔擬薛濤箋
穀雨親蠶近花朝拾翠連
魚龍曼衍戲吹進玉階前

積翠激波闊披香暖殿開
天低烽火樹日動蔓金苔
獺

隨勻猶溼羊車過不回
賸陳列女史萬一漢皇來

芍藥為離草鴛鴦是匹禽
君無神女夢妾有楚王心
日短黃金屋宵長綠綺琴
相將戒霜露拜月繡簾陰

金鑰魚司夜瑤箏鴈列春
後庭通綺閣清路接芳塵
同備三千數誰辭第一人
君王壽萬歲行樂此時均

景陽井

踏臂歌殘辟月昏
驪龍猶藉井生存
石闌漫浣臙脂色
不似湘筠染淚痕

過楊員外別業

員外名乘字文載濟南人官浙省員外郎以累斥至正十六年淮張

之辟乃遺訓二

子貞卓自經

翠羽無深巢麝香無隱穴由來老蚌珠淚泣滄海月於
乎楊員外竟類膏自熬憶昨佐南省四境正騷屑朝廷
忌漢人軍事莫敢說遂罹池魚殃端被柳惠黜寄身傍
江潭乃心在王室星躔錯吳分氣候乖鄒律天風搖青
蘋徒步空短髮譙玄初謝遣龔勝終守節譬如百鍊鋼
不撓從寸折又如合抱松豈藉澗底蘖我時浮扁舟鷗

外候朝日荒郊無留景別業自深鬱時清議勸忠公寬
果昭晰大名流天地當與河水竭結交卣卓間遺言見
餘烈

三貞篇寄納琳哈喇參政幕下僚友

梧西女陳氏顏色絕勝玉阿耶燈窻下古傳常暗讀義
須嫁官人麻臬心所足兵麾忽東指烽火蔓平陸魚鼈
遭顛連鷄狗同迫逐猘猢多其口反噬机上肉母子泣
相誓寧死不汝辱春輝黯門楣寒日照鬼錄皇天實鑒

臨家廟為慘肅

陳氏母曾宋直講確之七世孫女

髮婦

惠婦具俱縣人

亦在難

自判受命獨臂血濺賊衽賊歎為斂縮差差白刃間偉

節驚耳目荒野雲雪暮緬想會深竹水流風悲鳴星迸

萬羽鏃回首陷沒地何限委溝瀆大參行當來卹典具

簡牘前湖百世祀

謂五代時烈女何氏

明妝儼車服從以雙素鸞

配享疇敢黷孤蓬任漂轉餘齒寄草木倡茲三貞篇庶

用矯浮俗

送楊子明知事從觀孫元帥分制沿江州郡

寒日動大江鞍馬散滄洲
漚光滅沒外迴見冰梁浮壯
士無人色旗羽風颭颭楊君志
弧矢笑被黑貂裘祭輶
千仞岡掉鞅萬斛舟先聲掠淮甸
遙制三邊州元帥統
將權言責在軍謀一言闕興喪跬步分
陽秋天地屬閑
塞波伏蛟龍湫孤煙起天際薄莫青轉幽
百里靜鷄犬
豈但窮兵由雪賀薺麥生猶聞鑄戈矛
頻年竭土壤經
時委川溝行其所無事凋瘵或少瘳
耀德不觀兵當今
第一籌君昔甚惻隱曲宥千俘囚
歸裝輕于葉廉價重

琳球敝邑蒙薦臨多暇獲譙游鳳凰巢阿閣黃鵠宜遠
投萊竹霜實繁知止疇與侔蘆根短刺水鷺斯空啾啾
顧予麋鹿姿蓬蒿翳林丘行藏任本性道義期加修

夜坐

落日秋氣昏回溪夜噴薄幽花欹露榭孤螢墮風閣沖
襟謝煩歎廣簟生離索躡履望明河南天正飛鵲

義僧行

世降道淪喪盛事罕見之我歌義僧行斬取國士知僧

臻生夏浦俗號徐大師勇敢重意氣赤手可獵麋張忠
郭解流任俠不計貲臻願出門下致死誓不移盜尋寇
馬洲魚肉乎蒸黎元戎堅營壁大姓深溝池壯哉張父
子分率脫項兒父擒子死難家不得斂屍臻聞切齒恨
恨死不同時夜即操斧刀奮身斫藩籬徑入牛宮內斧
斷張紮維手殺盜六人力挽間道歸妻孥拜堂下金幣
謝所私上公賜巾裳欲以好爵縻幡然掉臂辭還山弄
摩尼方今國步艱中外罹瘡痍銅虎盡懸綬鐵馬誰蹇

旗嗟爾匹夫臻足張三軍威何不食君祿為君靖淮夷
收名魯仲連千載為等期天秋黃葉脫日暮玄雲馳歌
詩節鼓吹用壯吾熊羆

壯士歌

明月皎皎白玉盤大星煌煌黃金丸壯士解甲投馬鞍
蒺藜草深衣夜寒劒頭飲血何時乾

寒機女辭

鴛鴦機滿東西舍雪璽綵來日相射世俗競染紅藍花

妾心鍾愛金絲柘君王錦繡焚殿前天孫鳳梭蛛網懸
織成雲霧製龍袞萬一熏香分御筵

君家柳

君家柳萬株一色鵝黃酒龍鱗波暖裊翠煙飛花直渡
江南天倉庚立曉燕穿午薄暮啄木聲丁然腹中樹蝕
皮齧馬舊陰半減金城下長條短條屬行人猶有持斤
斲之者秋來大地落葉鳴心憶陽春淚如瀉

夜何長三疊寄周參政伯溫鄒僉院本初

夜何長日苦短夜長復寒日不暖深林火薄鷓鴣滿尾
頽魴魚游纂纂千年古鐵紫氣纏赤帝當之白蛇斷中
朝老臣雙珮蒼憂心鬱紆寢息忘鳳凰在笈驥服箱雪
埋石棧冰河梁夜何長六龍回轡東扶桑

夜何長日苦短夜長復寒日不暖蒼梧九疑雲思遠驚
鴻亂落夫差苑漢家騎尉雙龍蒼酒酣起舞隘八荒疾
風吹沙百草霜玉釭朱火青凝光夜何長帝車高轉天
中央

夜何長日苦短夜長復寒日不暖欒槍參旗燭雲罽樹
樹梅花落姜管江南布衣雙鬢蒼歲闌獨立氣慨慷衣
冠禮樂制孔良路迢無由貢明堂夜何長啟明耿耿天
東方

奉陪神保大王宴朱將軍第聞彈白翎雀引

并序

白翎雀燕漠間鳥也初世皇命伶官石德閭製白
翎雀曲及進曰何其末有孤嫠怨悲之音石德閭
未之改而已傳焉戊戌冬淮藩朱將軍宴大王於

私第逢忝坐末時夜電霰交下衆賓相次執盞起
為王壽逢亦起王命左右鼓是曲且語製曲之始
俾歌詠之逢謂續事本實左氏所先故鋪陳興龍
大略而不暇他及也

玄陰互天雪欲作將軍西第夜張幕銅盤蠟光紅照灼
四坐傾聽白翎雀雀生烏桓朔部落大樸之氣元磅礴
地椒野糝極廣莫穹廬離離散駝駱黃羊蘆酒雜湏酪
鷹狗畋獵代耕獲太王肇基不城郭青春建橐宵罷析

聖澤滂沛蔓綿絡風淳俗龐法度約乾端坤倪露沖漠
羽毛麟介並飛躍庭祠歲饗咽管籥雄雌和鳴莫我樂
帝皇赫然太陽若八表晃蕩氛盡却前驅屈盧從繁弱
睢盱喁呬萬狀錯遂朝玉帛解組縛大明宮開夾花萼
文監武衛盛材略蔥珩穀璧映霜鋸五雲夔龍奏韶濩
九苞鳳凰降寥廓德音威儀匪予度萬姓拭目瞻阿閣
軒轅伶倫兩冥冥八十年來事非昨獲塵雜亂入道削
咬哇哀淫頌聲鑠皇孫讓賢執鼓鐸巾冪鵲尾黃金杓

殺烝體薦嚼復嚼巴渝舞隊驩回薄供奉革鞜衣狐貉
銀箏載前酒載酌延秋門深魚守鑰緱山遠度吹笙鶴
淮南昔者鷄舐藥千乘之國棄敝蹠方今羣雄自開拓
拔刃把稍爭刺斫為臣義同葵與藿將軍固合鞭先著
蓮壺漏沈薇露涸枯梢號寒風墮籜百禽啁噍電霰霍
冰花亂點真珠箔箔中呱呱情陡惡供奉若爾停弦索
吁嗟白翎將焉託有客淚下甘丘壑

奉陪杭右丞程禮部以文字文憲僉子貞魯縣丞

道原宴周左丞伯溫館舍時聞河南李平章恢
復中原

西湖館舍開新秋三峯倒影紫翠流白馬彫戈駐達道
金魚玉佩羅林丘二孤五老獨神往八公六逸同天遊
時維小康況大比萬乘少紓東南憂如澠之酒官寺送
風生酒波鱗甲動荔子漿凝赤露香鵝肪炙作黃冰凍
歌袖頻熏婆律膏渴姜解奏參差鳳右丞閱霄漢逼
諸叟文章臺閣重罍噉駸駸落日涼菱花蘂葉掩冉光

驚飛先自有烏鵲寡宿未必無鴛鴦堯封禹跡煙莽蒼
宣髮固短憂心長側聞汴破濟欲下百姓亦望臨淮王
山人厭亂喜莫量笑整冠帶為舉觴醉後不登嚴武牀

歎病駝

狂夫東遊乘白驪道路適遇病橐駝紫毛無復好容色
肉鞍尚聳雙坡陀南人從來不夢此私怪目擊臨干戈
泉渠元自控蕃落天苑畢竟連銀河吳郊楚甸水草淺
任重却欲千斤過青袍朝士為起立茜帽番僧時撫摩

熱風吹塵鼻出火積雨成潦瘡生窠牛蝨狗蝨苦嘬血
未由驅除知奈何頻年出師數百萬熊羆獅豹相奔波
豈期獨後死溝壑餘光所及良已多老奚首帕短袴靴
手持鞭策涕泗沱憶昔灤京避暑日氣骨礪巖從鑾和
沈沈金甕夾捫馬裊裊錦帶懸靈鼉服勞輦下藉髯刷屈
跡澤畔甘蹉跎疇能推廣愛烏義沒齒仰飼公田禾

長樂未央玉璽歌為秦景容總管賦

赤龍銜日照赤子白蛇橫斃烏騅死東風吹冷咸陽灰

長樂未央連闕起
昆吾寶刀截瓊肪
陰文小篆雲漢章
盤螭作紐徑二寸
歷歲四百傳天王
黃星孛明銅爵舞
銅仙淚泣如絲雨
盜將神器竟不歸
璽亦漂淪頻易主
使君購得心良苦
君不見豐城有劒氣
上衝米船也貫滄
江虹陋歌先附蘇
卿鴻

歲星漸高贈王伯統進士

歲星漸高辰星光
鎮星不動天中央
熒惑退舍太白斂
晝芒南斗尚爾雲
微茫有美一人被
褐裳思君思鄉垂

十霜馭娑駘
盡氣鬱蒼王
屋石室岌相
望願陪先驅
弧
四張歲星輔
日照八極還
種祭田汾水
陽

簡鄔同僉

南粵稱臣陸
賈勞漢廷何
愛璽書褒恩
波遂與三吳
闊
爽氣真連北
斗高鶯囀羽
林交杖杜馬
間沙苑暗蒲
萄
天心厭亂民
懷德未說關
河恃虎牢

送王季德主事祠南鎮還京

千羽春明玉
扈間皇華躬
遣祀稽山蓬
萊雲霧隨封
檢

數落仙曹降珮環宣室舊承前席問樓船今駕海濤還
東南父老憂時切落日扶藜得重攀

秋感六首

吳門葉落季鷹船朔埜霜橫白鴈天三楚樓臺餘夢澤
兩京形勢自甘泉采雲帳幄冷風滿瓊樹花枝辟月圓
本是宣光中興日腐儒長夜泣遺編

紛紛攘攘厭黃巾妖血徒膏草野塵馬化一龍猶王晉
楚存三戶未亡秦颶風天靜浮青海朔漠山高直紫宸

莫為鬼方勞外伐，壓弧箕服最愁人。

豆苗瓜蔓未應稀，菰米蓴絲積漸肥。
南極有星天半隱，東維無地海全歸。
連城不換相如璧，百結何妨子夏衣。
回首故山荊棘外，幾年空翠鎖煙霏。

茗花薔葉繞林扉，獨立蒼寒見紫微。
夜久長庚隨月上，天清高鳥帶霜飛。
東南吳會三江入，百二秦封六國歸。
烈士莫年心未已，無言思解白登圍。

南越東吳帶楚皋，頻年醉眼送飛毛。
滄洲露白蒹葭滿，

甲第秋聲蟋蟀高九日天涯桑落酒三軍城上柘黃袍
試觀漢後詩人作獨覺遺風屬阮陶

鱗魚風息淨江波軋軋機絲響薜蘿華髮道途秋日短
曠懷樓閣莫陰多浮查受宿炎州翠細草從眠墨沼鵝
心自隱憂身自逸幾時天馬渡滹沱

簡陳韋姜員外

陳基敬初

幕府深嚴午漏遲簾文簾影碧參差總傳白馬陳從事
每念青袍杜拾遺大地風塵憂未解扁舟江海去無期

涼天鴈叫芙蓉發
許奏軍中鼓吹辭

陪淮南僚友汎舟吳江城下

波伏魚龍夜不驚
菱花千頃湛虛明
吳儂似怪青絲馬
漢月重臨白帝城
世說竇融功第一
獨憐阮籍醉平生
樓船簫鼓中流發
喜及東南早罷兵

送薛鶴齋真人代祀天妃還京

蓬萊宮裏上卿班
代祀天妃隔歲還
日遶五文皆御氣
海浮一髮是成山
風霆夜護龍鸞節
雲霧朝披玉雪顏

聖渥既隆玄化盛轉輸應盡入秦關

留別陸芳潤張孟膚田仲耘王孟翼

楓葉殷紅枳實肥
蘋風蕭颯芰荷衣
自甘許汜求田去
不擬劉蕡下第歸
日落大荒獮夜哭
天含積水鶴雲飛
諸君有待乘槎使
直犯星河織女機

題虎樹亭

宋聰禪師住華亭時有二虎噬人師降伏之命名曰大青小青師卒虎亦死弟

子瘞之塔傍踰年生銀杏樹二今主僧隱公闢亭樹間扁曰虎樹

舟泊東西客詩招大小青山高白月墮草偃黑風腥植

物鍾英爽精藍被寵靈涼陰慎翦伐留護石函經

過馬天章水村居

嘉興馬錄判歸築水村居土銼長腰米尊羹巨口魚青
衫沾露薄華髮向秋疎尚爾丹心壯無時去玉除

近故二首

近故儒林老子予起嘆嗟清秋書柿葉落日賦桃花碑
碣留吳滿雲山向越賒多情楚宮月來照未栖鴉

近故維揚老威儀本漢官才高三禮賦心折一泥丸露

氣金盤溼簫聲碧落寒空餘茂苑樹鵲血幾時乾

成廷圭寓

維揚卒于至正末
年二詩為成而作

鄰飲

蠟炬繞紅鸞盆花玉露漙無家憎月色多難薄春寒毛
穎時旌鬼黃金少鑄官西鄰濁酒熟得罄一回歡

聞畿甸消息

白草生畿甸黃沙走塞庭直憂星入斗兼畏雨淋鈴殿
閣餘龍氣衣冠自鵠形吳粳斷供餉隴麥向人青

和惠子及雨中

桃花昨夜愁盡發燕子今春疑不來
雪衣鸚鵡亦可怪錯喚主人非一回

題李唐江山煙雨圖

煙雨樓臺晚靄間畫圖渾是浙江山
中原板蕩誰回首只有春隨北鴈還

馬頭曲

馬頭者大都名姬也始為黃禪太子寵黃禪伏誅沒入以賜太平王王薨子騰吉斯

留之騰吉斯被殺復沒賜布克布克國語力士也

和我漢明妃亡吳越西子鬼妾賜元臣孰受盧弓矢
前時楚襄夢今夕伶玄妾瓊斷藍橋漿紅流御溝葉

萱圖為李恒題于茂清軒中

暄風宜男花涼日忘憂草一種兩舍情親容夢中老

游鯉山

舊名由里山

鄉山三十三游鯉奠郊南巖然獨高大秀掩東諸嵐土
剛蓄炎精崖仄削劒鐔我嘗挹飛翠遠在滄江潭波濤
與伏興雲霧相吐含恍然穆王駕八駿左右驂又如琴

高仙脚踏朝蔚藍久思更徽號新喜遂幽探太白賦九
華後來成美談狂歌繼其武林間免愧慚春風綠瑤草
秋霜紅石楠行將修月斤為鑿避世龕蛟龍正格鬪鯢
化誰其堪

次鰕妾岸

常熟州

朝辭鳳巢村晚次鰕妾岸起望大角間太白光有爛方
罹杜陵苦未已崔盱亂鬢毛掠蝙蝠竹裏鳴鷗鳴同曹
迫憂悸相視名錯喚前途非樂土殊昧賢達筭誰家繚

崇垣轆轤卧井幹餘歌久悽惋酣宴同清晏寧知楚幙
烏不寤吳宮燕蕭晨理舟楫回首重悲嘆

讀貞燕記有懷魯道原提學

天涯老孤臣想象賦貞燕空梁泥屢落故渚冰自泮影
託明鏡鸞夢接長門鴈飛雲軒不歸自語清商怨

元貞二年雙燕巢于燕人柳湯佐之家一夕家人以
燈照蠟其雄驚墜猶食之雌彷徨悲鳴不已朝夕守
巢哺諸雛成翼而去明年雌獨來復巢其處人視巢
生二卵疑其更偶徐伺之則抱獨之殼爾自是春去
秋來凡六稔觀者譁然目
為貞燕云長沙馮子振記

義鄧

吾鄉有鄧添千里負主骨晨夜竄草間宛轉時虜窟胼
胝苦何辭性命間一髮日車昏盪沒虹暈或抱月魂氣
相衝塘鳥獸亦猶狨經過百戰地青春暗消歇深幸主
有靈全生及城闕主母悲喜集流淚心激越主妾事他
人空庭自花發主昔為龍蛇公論不可沒但感衣食思
疎戚均賞罰在家為義奴在軍為義卒庶幾銜土烏尚
愧擊蛇鵲淒淒薦霜露哲哲上參伐不見秦舞陽悲風

動天鉞

排難行

贈王
子中

相如全趙璧子敬存家
璫臣子奉君父由來義
當然我為排難行期播
今後賢至正十六年楚
氛蔽吳天南臺塔御史
盡室方顛連風波萍浮
寄墟落匏孤懸內無虺
蜥援外絕鴻鴈傳縮地
漫勞想拔宅欲假仙形
勢轉倉皇一日猶三年
君聞急友義側身入烽
煙得子猛虎穴摘珠驪
龍淵菱花奩影合桂樹
月魄圓青青驄馬駒環

珥映後先相看喜至骨欲語翻淚漣報之錦繡段長謝
賦歸田遂令鷄鳴客遠愧齊魯連我時載茶具蕩漾五
湖船蕭蕭春陰莫載歌伐木篇

贈窮獨叟

窮陰結長寒木介河生澌曠野獨獸號異鄉孤臣悲薜
衣帶胡繩三年限朝儀豈徒無炊火顧有麻斬齊身幸
免污辱言之淚交頤脫急藉朱家弔古懷要離遡風酒
三酹老氣吞畎夸誓刳梟獍肉用塞烏鳥饑漢酬張良

志吳乞伍員師行歌獨漉篇以繼從軍詩

登崑山寺謁劉龍洲墓

陰崖鼈裙披蕭寺壓其左前無容馬地而公靈永安綽
有高世風荷畝誓埋我懇懇中興論汎汎岳陽舸竹西
旌佩間為士非瑣瑣我來行吟久顧影歎復坐上下百
年餘同遇時坎圻疎嵐冒川暝歸鷺跼跼墮怒馬上孤
舟星流亂漁火

游卜將軍墓祠

將軍名珍字文超唐西河人
有功業在崑山民至今祠焉

時危短吾裾，薄游東崑野。
有唐將軍瑩，肅肅風露下。
木葉金甲動，土花碧血洒。
居然神兵栖，夜思石驕馬。
二蛇顧首尾，勢若無禦者。
當時陣或然，威福巫得假。
靈烏拂人首，疎火散村社。
淒淒婁江波，壯懷託申寫。

題留侯小像

漢高三尺劒，子房三寸舌。
剛柔兩相濟，秦降楚隨滅。
君不見乾坤狡兔飛，鳥秋脫使子房無世仇。
箕栖賴飲老。

一作
死則休

史驪兒

驪燕人善琵琶至治間蒙上愛幸上使酒縱威福無敢諫者一日御紫檀殿飲命驪

弦而歌之驪以殿前歡曲應制有酒神仙之句
怒叱左右殺之後問驪不在悔曰驪以酒諷我
也前和州同知李澄言于達欲傳其事達為賦
一辭澄字仲深開州人翰林承旨惟中先生從
也子

虎帖耳豹俛首青天白日雷電走尚食黃羊光祿酒史
騾曲曲春風手蕭王馬蹴滹沱冰亞父玉碎鴻門斗鳳
凰鍛翮蚌珠剖趙女含瑟秦娥罷缶飲中八仙方下來
御溝濺赤花飛柳君不見龍生逆鱗海岳寒嗚呼史騾

乃敢干和州孤臣說舊語梨園弟子更新譜

三月十二屬予初度時客舍承朱僉樞攜僚佐見

過

我生三月之仲丁長庚輔日當奎星命居旄頭身驛馬

薄有抱負多飄零鷓鴣嘗賞金陵酒蛟龍幸護錢塘軒

乙酉十二月予獲母觀泊
錢塘鄰舟多為風潮所覆
魯連海上隱行歌吳王臺前

辭下走清齋庚果廿七種短疏劉蕢四三首才名從知

造物惡心臍空夢神人剖

乙亥科舉罷或勸予學律因
感異夢見心藏皆五色遂止



茲辰客舍風雨俱湯餅尚少囊中蚨正冠試誦蓼莪什
衝泥適來櫻筍厨帳士彈箏玉連瑣廬兒執爨貂襜褕
落花簌簌香埽途闔座氣作思馳驅箕不以簸斗不斛
仰面大笑真吾徒

題蔡琰還漢圖

銅臺春深邊草綠琰因名父千金贖殘生既免羶裘鬼
哀哀莫盡蘆笳曲舊時漢妝慵復理感義懷慚歸董祀
入朝好語亂世雄賤妾不為天地容爾其忠事山陽公

合淝東遂菴學正為畫君山醉月圖長歌奉謝

憶攜蓉城霞

吾鄉酒名

醉賞君山雪興酣俯崖面三醉大江

月靈竒秘怪不可說回首十年塵土熱東卿想像作此

圖如見當時眼為豁是山傑立氣皓鮮四八賓從咸華

顛

吾鄉有三十三山君山為之主

銀濤絲縈料角海

料角地名遠在通州

玉臺鏡露

峨眉煙

峨眉嘴即在君山下

槎牙亂樹拔虎窟撇捩小艇吞龍淵

樵子罷斧僧罷磬木瓢一箇滄茫前君不見江山元與

天地闢有月無人景虛擲崑岷東來幾萬里衣冠雲散

三千客三千客後世屢易曉事僅有羅春伯

事見郡志

龜跌

榴翳鬼照火鼇背蒼涼獸交迹君不見采石紫綺裘赤
壁洞簫歌樂者信曠達齷齪將如何歲云莫矣雙鬢皤
夢恍茅屋牽青蘿廣寒白兔下相杵貝闕鮫女趨鳴梭
卿聞大叫當就隱指日莫問魯陽戈

浦東女

浦東鉅室多豪奢浦東編戶長咨嗟丁男殉俗各出贅
紅女不暇親桑麻鵲鳩呼雨棟花紫大麥飲香勝小米

一方青布齊裹頭赤脚踏車爭卷水水低岸高力易歇
反水上田愁漏缺穀種看如瓜子金野鴉不銜田鼠竊
黃草衣薄風披披日色照面蒼煙姿南鄰北伴更貧苦
糠粃糜粉隨朝齏阿嬭送茶相向語鉅室新為州府主
妻拜夫人婢亦榮繡憶朱輪照鄉土羊牛下來鷄欲栖
汪汪淚眼數行啼女自身長苦非一歸路白楊斑竹西

胥門柳

今年胥門十一月楊柳青青寒不脫雕戈白馬黃鬚郎

朝朝忍見行人別行人吳頭或楚尾心趁飛花度黑水
避暑鑾輿狩未回都人南望思投箸都人泣向都官道
塞北江南柳還好風纔露沐恩既殊報荅春光願終老
君不聞虎狼之秦六國雄可憐千丈泰山松至今稱是
大夫封

劉夫人

劉夫人至正太尉吳王嬪笄珈車服置弗御澹煙常鎖
雙眉春中州援疆敵在目叔貴日驕疆日蹙背城借一

王本心狐埋狐搨將軍欲夫人勇決烈女義百口樓居
親舉燧片時陰慘萬古生月明風清珮音至君不見男
兒成敗古有之孰以楚霸輕虞姬蘇民安得夫人祠烏
栖白鳬庶少衰

讀閩僧謙牧隱所題鴈宕大龍湫西瀑布常雲展
旗天柱卓筆雙高峯詩予為之色動槩括一首

鴈宕龍湫氣混濛展旗卓筆勢爭雄翠珦霄漢雙鸞影
玉立東南一柱功興入常雲飛夏雪醉看高瀑挂晴虹

總慚尊者空諸有萬木圍巖夜自風

冥鴻亭偶題二首時歲戊戌

春陰過却幾番風野店山櫻霧雨中新水綠塘鵝並浴
嫩寒茅閣燕微通大兒稍熟春秋例幼女歡趨組繡功
四十今年渾意足酒炊香滿巷西東

一家無事樂清寧寄目冥鴻野外亭江水未分南北限
月明常後畢箕星子生猫櫟垂垂赤蔓長鴉藤故故青
天意物情應有在且須料理相牛經

聞何上海子敬毀淫祠開鄉校因寄四韻

魚米駢登橘柚垂
備聞佳政起深思
女巫罷進神弦曲
鄉校新陳魯頌詩
風葉晝埋公館靜
霜鐘寒度海雲遲
高天鴻鵠東回首
亦欲朝陽借一枝

無錫寓隱謝王左丞彥熙攜酒餽遠過

玉帳旂旌拂紫冥
樓船神物護青萍
風雲密擁將軍樹
江海孤懸處士星
深愧草茅優簡拔
未忘蒲柳易飄零
竹西歌吹高陽酒
喜為尋春過野亭

十二月廿二日為重陽王真人誕辰是日立春在
淞江長春道院瞻拜真人及七真像敬題薛一

山丹房

寒盡東風破曉陰真人遺像儼如臨山中霞熟千年醞
海上蓮開七朶金朔地興王資化力鈞天朝帝動仙音
私忻泉石膏肅久終日凝神紫氣深

無題五首

五緯南行秋氣高大河諸將走兒曹投鞍尚得齊熊耳

卷甲何堪棄虎牢
汧隴馬肥青苜蓿
甘梁酒壓紫蒲萄
神州比似仙山固
誰料長風掣巨鼇

天槍幾夜直鉤陳
車駕高秋重北巡
總謂羽林無猛士
不緣金屋有佳人
廣寒霓仗閒華月
太液龍舟動白蘋
雪滿上京勞大饗
西風華岳弔秦民

白衣艣艣渡吳兵
赤羽旌旗奪趙營
灤水天迴龍虎氣
榆林風逐馬駝聲
靚妝宮女愁啼竹
白髮祠官憶薦櫻
猶有海鷹神不王
駕鵝高去塞雲平

五城月落靜朝鷄萬竈煙消入水犀
椒闥珮琚遺白草木天圖籍冷青藜
北臣舊說齊王肅南仕新聞漢日碑
天意人心竟何在虎林還控鴈門西

十載羣雄百戰疲金城萬雉自湯池
地分玉冊盟俱在露仄銅盤影不支
中夜馬羣風北向當年車轍日南馳
獨憐石鼓眠秋草猶是宣王頌美辭

後無題五首

一國三公狐貉衣四郊多壘鳥蛇圍
天街不辨玄黃馬

宮漏稀傳日月闌嵇紹可能留
濺血謝玄那及總戎機
祇應大駕懲西楚弗對虞歌北渡歸

吐蕃回紇使何如馮翊扶風守太疎
范蠡不辭句踐難
樂生何忍惠王書銀河珠斗低沙幕
乳酒黃羊減拂廬
北陸漸寒冰雪早六龍好扈五雲車

回首崑崙五色天疎風落日重
回僮駕驂八駿非忘鎬
臺置千金舊慕燕地限上林雲過鴈
雪封西嶺樹啼鵲
遠慚行在周廬士橫草無功日晏眠

險塞居庸未易劖望鄉臺上望鄉多君心不隔丹墀草
祖誓無忘黑水河前後炎劉中運歇東西元魏百年過
愁來莫較興衰理只在當時德若何

黃河清淺海塵揚陝月關雲氣慘蒼寧復明珠專覽社
尚論玉兔踞金牀衣冠並入梁園宴簡冊潛回孔壁光
私幸老歸忘世事梧桐朝影對溪堂

列朝詩曰無題前
後十首皆感悼王

師入燕 庚申
北狩之事

覽周左丞伯溫壬辰歲拜御史扈從集感舊傷今

敬題五十韻

華夸今代一畿甸上京遙游豫循常度恬熙屬累朝六
飛龍夾日獨角豸昂霄御史箴何忝賢臣頌早超咨諏
新境俗觀采衆風謠文用彌邦典忠惟振憲條執徐當
景運仲呂浸炎歊愍解民心結煩除聖念焦雨工趨汛
埽市令薄征徭大口謹移蹕庸闕肅衛刁緡雲峯立曉
薌月水涵宵徼道臣臣俊清塵騎騎驍豹軀嚴御勒駝
象妥鑾鑣儀仗真如畫車徒不敢囂侏言來部落皮幣

贊荒要岳牧恭迎舜封人願祝堯六宮程緩緩列寺思
飄飄絲裊雙行鞚瑤鳴雜佩瑤寶鈿榆英小錦罽草花
嬌繡襖珠鞵絡香鬟玉步搖婕妤辭並載王母會頻邀
拾翠深沙嶺梯虹複澗橋天長躔北日斗近建南杓珍
味高陀鼠丹磬散地椒廬兒分逐兔土屋競停雕白貉
衣溫座黃羊酪凍瓢桓城金合沓灤闕紫嶢嶢社稷尊
王統山河固廟桃明明神爽降秩秩禮文饒寵遂光幽
朔畋同閱獮苗蹕林圃已舉款塞福皆徼棕殿三呼歲

楓墀九奏簫祝融回酷暑少昊戒靈飈舊制先回輶良
辰次起軺謝恩多帝胄紀實得臺僚至治音俱雅於皇
德孔昭相如慚禪議謀父感祈招叢爾蘄興祲紛然穎
煽妖漕輸橫蜃鱷衡祀闕簫邊警初傳箭軍容半珥
貂薦添烽堠迫有甚火雲驕袞服中垂拱微垣外寂寥
幾多遺鶴髮曾共望鷄翹二洛過通晉三韓復入遼不
無雙國士正賴一嫖姚求劒舟難刻更弦瑟好調扶顛
須砥柱撥亂豈芻蕘戎幙辭巢父詩壇老伍喬式瞻阿

閣鳳馴止泮林鴉併論公殊蹟吾知邁董鼂

寄僕正字

君遷正字職秩視校書郎太乙藜分焰銅仙露湛光鵷
班清漏裏鶴駕霽雲傍署轉宮花密溝迂御柳長芸窻
填竹素蓬觀啟銀鑪魚豕知訛舛鉛黃屬訂詳聖王經貫
道家世桂名坊一氣根幽朔羣英萃豫章比蒙青眼待
益見白眉良傳癖稱元凱文宗得子昂冠將戕獬廌豺
已避康莊大器遭斯運凡材信彼蒼哭親嵐瘴邑懷友

月蘿房病謝臺臣薦書煩驛使將暖餘牛背日寒遠馬
蹄霜野褐方山帽畦蔬德操桑策陳憐賈誼裾曳恥鄒
陽任性何孤僻傷時或慨慷園丘虛墀壇太廟攝烝嘗
珥筆誰丹宸紆金盡玉堂海涵恩靡極哀補責宜償十
樣牋霞漿雙壺酒雪香珠璣新傑作龍虎古雄疆好約
重觴詠秦淮夜對牀

簡夏嘉定

百里繞吳煙重過喜地偏深城遲閉戶細港倒回船莫

汐煙開甲秋原木放綿民風返淳厚正賴使君賢

乙未八月避地前湖三首

兩地初讐殺全家屢死生守臣無大過雄長自相爭魑魅闕當屋鵲鷗啼過城前湖落木外排難愧齊卿

借地安樵爨秋煙滿桂叢禍因貧賤少詩到亂離工有妹音徽隔諸兒起卧同數畦烏口稻滿待熟天風

竹底秋光薄牆根朝日暄稍通鄰曲好深荷野人恩細雨菰生米新霜芋長孫加餐向茅屋醒眼看乾坤

丙申八月紀事時自鄉里入吳還華館遂卜隱鴻

山

寸舌解重圍長歌振短衣不成巢父去空似魯連歸
蔡港沙田薄黃山宰木稀伯鸞吾所慕梅李況魚肥

常州江陰再失無錫告警病中自鴻山將遷海上
病就山中隱烽催海上舟連城新鬼哭深壁大臣羞
赤青躔金火炎風汗馬牛遙占女兄弟先已下長洲

至正丙午三月廿八日自橫泖遷居烏涇宋張驥

院故居有林塘竹石因扁堂曰儉德園曰最閒

得詩凡六首

錄三

卜宅賓賢里生涯始有涯憂緣常念亂貧為數移家徑
合交枝果簾當獨樹花池臺幾峯石相友卧煙霞

鄰曲敦新好園林恍昔游衣冠時徑入棊槩夜忘收已
遂蓴羹興何煩杞國憂人生貴行樂兩鬢颯先秋

無才甘在野多懶愜行園石露漙雲氣池風損水痕草
深眠雉子林靜習鴉孫擬著幽居錄漁樵共討論

得兒掖書時戊申歲

客夢躬畊隴兒書報過家月明山怨鶴天黑道橫蛇寶

氣空遺水春程不見花衰容愧耆舊猶語玉人車

此詩
記戊

申歲正明太祖
改元之年也

舟過吳門感懷二首

躍馬橫戈東楚陸據吳連越萬熊貔風雲首護平淮表
日月中昏鎮海旗玉帳歌殘壺盡缺天門夢覺翮雙垂
南州孺子為民在愧忝黃瓊太尉知

強兵富境望賢豪戴縑垂纓恨爾曹一聚劫灰私屬盡

三邊陰雨國殤號江光東際湯池閭山勢西來甲觀高

形勝不殊人事改扁舟誰酹月中醪

張氏之據浙西也原吉有功名之望

焉故首章末句如此其間吳門消息有云盡擬田單收故土不期高幹損雄才又云三年弟傲羣情懈十月城圍百戰休尤多痛惜之意至于稱士德為孤忠謂東吳為唇齒是則書生之見而已矣

題心覺元上人觀露軒

上人吾鄰人趺坐中竺嶺澹然觀朝露月落萬籟靜豐林始如沫萎華颯以冷石牀仰嵌竇餘滴下微影世皆

汨塵勞天或示短景忘言理深詣收視妙獨領茂陵和

玉屑

一作淒清
蟬暫吸

有恧鶴知警雲深粥魚鳴盂鉢躬自整

趙善長山水

畫師今趙原東吳諒無雙寸毫九鼎重烏獲力靡扛翠
樹擁羽旂深崦敞雲窻參差見壘罽不無酒盈缸老山
石黃色插脚琉璃江隱若赤壁壘勢壓曹魏邦何當柔
猛虎蛟鱷遂我降欠伸列仙崖噴咳漁蠻缸

唐昭儀李漸榮辭

日繫包桑地瓜果剖宮闈去尺非唐有庭春草合車斷音
忝備昭儀奉卮酒御香紫袖纖垂手載拜載祝南山壽
龍須席轉蓮炬移狼角斬天猗突牖不辭隕命同君后
女三禍前妾忠後無人為語巢賊奴莫使兒知環柱走

宋婉容王氏辭

并序

徽宗在北四太子請王婉容妻卮雅滿子上遣之婉
容大哭曰何忍一身事兩主就輿中奪刀自刎死
太子嘆異擇地葬之且為立碑曰貞婦冢事載俞

文豹吹劍錄

二宮有警無嚴蹕賤妾徒為虜雛匹假如青冢向黃昏
不若金刀照白日白濡一縷願隨終煙沙漫漫霜雪容
令人想見旌貞石氣敵雙高湖上峯

原吉詩于忠孝節義之事往往三致

意焉表微闡幽美不勝記茲特採其尤者錄之云

夜過蒼墩江隱居

白茅蕭蕭風色昏歸人自語煙際村我騎蹇驢童抱尊
記得君家忘却門徑穿竹入背江路傍是梁朝敬宗墓

月中對鶴吹洞簫露水淨然落高樹

題崔白百鴈圖

為宣城黃
宜之題

老愚離羣影久孤客來笑示百鴈圖指眇試數失兩箇
莫喻畫意翻令呼得非長門報秋使或是大窖傳書奴
不然一舉千里高鴻俱其餘淟汨碌瑣徒且喑且息翔
且呼營營鄭圃田之稷睢睢齊海隅之菰遑知爾更銜
爾蘆菰肥卒至克人厨小而曰騏亦就菽通聞澤梁弛
禁官罷虞麋鹿魚鼈同少蘇羽儀好在春雲衢

金世宗太子允恭百駿圖

為舒德源題

金家武元靖燕徵嘗誚徽宗癖花鳥允恭不作大訓方
畫馬却慕江都王此圖遺脫前後幅尚餘龍媒羣角逐
息鷄草黃霜殺菽王氣榮光等蕉鹿山人塵迷朔南目
溪頭姑飲歸田犢

葛稚川移居圖為友生朱仲矩題

仲矩名禹方

典午三綱紊無紀賊奴內向伯仁死辭徵尚蹈公以此
終託丹砂去朝市千年盛事傳畫史野夫獲睹朱氏郎

壯肩餽糧幼琴几杖懸藥瓢風靡靡長襦老婢手執箠
躬驅其羊羊顧子兩犍受牽頭角頗鰲厖殿隨亦忻喜
公披仙經瞳炯水琅琅餘音恍入耳後驂夫人謝釵餌
膝上髻嬰玉雪美句漏尚遠羅浮邇若有函闕氣騰紫
天丁山靈狀僑僂開鑿空青洞扉啟雲霞輸漿石供髓
二麗精華晨夜委金光秀發三花蕊飄飄上昇碧寥止
同時許邁行加砥一門翁孫良可儼波散豆者穎遺泚
嗟今凡民苦流徙落木空村淚如洗

趙文敏公山水為董竹林山長題

并序

公于畫左題云至大三年六月望日為吳彥良
畫并詩有岸靜樹陰合溪晴雲氣流之句想在
鷗波亭作也彥良嘉禾人

何山弁山秀可掬上若下若蘆荇綠翰林學士偶歸來
亭倚鷗波送飛鷗鷗飛盡沒滄茫境衣上青天倒搖影
鹿頭舫子湖州歌想帶南風覺淒冷冰盤瓜李進仲姬
管夫人字生綃畫就復題詩鄭虔三絕世無有於乎何幸再

見至大三年時

宋制置彭大雅瑪瑙椀歌周伯溫參政徵賦

并序

今太尉開藩之三月適江浙參政周公分省江

淮延飲齋閣歡甚以予避地無錫說王左丞晟

勸張楚公歸元特出瑪瑙椀曰此宋彭大雅燕

饗舊物子才器足以當之遂引滿酌之再氣酣

思湧率爾走筆以紀清賞非求知他人也

小序與列

朝詩集所載
稍有異同

詩曰

淮藩開吳豪俠滿歌鍾地屬姑蘇館相儒獨為緩頰生
笑出彭公瑪瑙碗血乾智伯骸不腥黃土瑩錯紅水精
妖墓蝕月魄半死虹光霞氣歆且盈隱若陣偃邊將營
彭公彭公古烈士重慶孤城亦勞止天忘西顧二十年
畝盡東南數千里武侯祝文何乃偉敗由宋祚民今祀
太湖底寧魚米豐官廨喜與閒門同酒波碗面動峽影
想見制置師犒飄風中再酌庶沃礫磊曾君不見漢家
將軍五郡封班氏天與世史功詩狂昭諫客吳越存心

唐室人憐忠嗚呼尚友吾豈敢醉墨慘澹雲飛鴻

七月聞河南平章凶問

六月妖星芒角白幾夜徘徊天市側尋聞盜殺李上公
窮旅孤臣淚沾臆當時寬猛制萑澤安得受降翻受敵
上公忠名垂竹帛書生奚為費禕惜東南風動旗黃色

蒲梢天馬長依北

壬寅六月田豐王士誠刺殺李忠襄
于濟南城下先是順帝見星變嘆曰

當損大將馳使戒諭忠襄
正此詩所謂妖星芒角也

謝中政院判敏珠爾昂霄枉過予龍江寓隱

三年江館閉斜曛一日星軺下紫氛
老我已非佳子弟壯公曾是故將軍
未央雙闕雲端見長樂疎鐘月下聞
還語中原縻絲盡六宮知愛石榴裙

送吳照磨赴李司徒幕兼簡張郎中

司徒分鎮越王臺甌婺山光入望來
堂上修文閒將略幙中求舊得賢才
鑑湖木落魚梁見紫塞風高鴈路開

莫禁白頭狂賀老酒船仍蕩月明回

時方
禁酒

寄婁上俞士平提學陸良貴秦文仲二教授

朱紱青袍映後先
邇來愁過買臣年
壚頭相釀囊須罄
地下誰游劍莫懸
淮浪白滔迴魯日
塞氛黃隔姓劉天
賤名忝在齊民版
為報新蕪傍泖田

寄陸宅之進士錢思復提學全希言學正

花開花落雪盈顱
三地相望一信無
梁震不慚前進士
杜陵寧是老狂夫
長淮浪接江逾闊
南極星聯斗不孤
想與窮經全學正
酒香鄰社杖同扶

經游小來涇簡木仲毅

髯參歸隱小郊垞
亂日曾聞險備經
風黑浪高羅剎海
月明天度使臣星
東都先見逢萌得
廣武重游阮籍醒
最是故家春草暗
杜鵑啼殺忍同聽

夢騎驢

蹇驢雙耳卓東風
前導青衣一小童
石澗倒涵嵐氣白
海霞高貫日輪紅
桃花芝草經行異
鶴髮鷄皮語笑同
却待朝天驚夢失
春醒無奈雨簾櫳

重游澱山

鰲戴小蓬萊方諸宮影開崖根龍洞闢山脈虎丘來疎
磬重煙水殘碑半雨苔因之懷故國游鴈落清哀

古宮怨二首

萬年枝上月團團一色珠衣立露寒獨有君王遙認得
扇開雙尾尾簇紅鸞

誤報迎鑾出禁宮階前草是鴈來紅玉顏豈就秋枯落
萬一和親在選中

雜題四首

洄塘昨夜綠波增，偶策交州鬼面藤。
一雨百花香洗盡，流春砒上立魚鷹。

几杖琴尊共一丘，燕歸巢近午香篝。
游絲不挂山人眼，直趁東風入別樓。

水涼風攪一池荷，睡眠醒來手自摩。
數席雲陰亂疎樾，髻孫驚報鶴羣過。

藻池岸匝水仙開，滿面香飄玉蝶梅。
遺事罷書山館寂，鼠狼行過雉鷄來。

江邊竹枝詞八首

游鯉客山高刺雲天門山小舊稱君插江鵝鼻移沙脈
愁殺浪撞黃歇墳

亂石呀聲大小灣石中無玉作連環楚江風浪吳煙雨
翠鎖修眉八字山

社酒吹香新燕飛游人裙幄占灣磯如刀江鱗白盈尺
不獨河魴天下稀

南北兩江朝莫潮郎心不動妾心搖馬駝少箇天燈塔

暗雨烏風看作標

北望大江南望城席帽馬鞍

並山名

屏障橫儂是小山漁

泊戶水口風門過一生

石筏橫津蛟莫窺近山張弩或眠旗儂作神衫與神女
祈水祈風郎不知

巫子驚湍天下聞商人望拜小龍君茹蘆草染榴紅紙
好翦凌波十幅裙

潮落蟆山連狗沙黃泥鞦浦趁江斜阿儂十指年嬌小

曾比箇中春荻芽

狗叫沙在蔡港西北歲產荻芽予家分佃頃半沙與蝦墓山糝浦相連

朱家奴阮辭

淮陰三月花開枳使君死作殊方鬼眼看骨肉不敢收
秦虜稱奴聽頤指經遼涉海三歲久以蝗為糧麥為酒
饕餮齧骨何足論親見徐山墮天狗今年始得間道歸
城郭良是人民非主家日給太倉粟殘生猶著使君衣
攬衣拭淚使君室涼月蕭蕭風瑟瑟回頭還語玉雪孤
勿辭貧賤善保軀瞻屋未辨雌雄烏

重過望亭新城二堡

丙申冬
張氏築

憶昔扁舟自西下二堡相望無一舍
吳藩判樞翻覆兒
窄衫小弓矜騎射歸人重經但流水
豆隴彎彎低復起
長途遺庶數十家三四酒旗風靡靡
君不見邠公遷岐
山衛人城楚丘外患內修古所侔
成同敗異嗟世

闕

會別馬頴漁

別業歸來千里餘泰山傾蓋喜無如
青衫不污新豐酒
白髮終乘下澤車地入東南空驛騎
雪消齊魯足淮魚

彼行此住情俱得尚約鷄肥落木初

寄錢泰窩陳雲軒二遺叟

天轉雲東上六符有懷無寐枕同孤
紫芝隱曲歌商皓
烈火殘經補漢儒
私地春先梅老發
盛陰雷疾草狂蘇
祖生遲旦疎殊甚
不計中流少一壺

喜顏守仁教授留園館信宿

前朝進士過林扃
信宿論心為竦聽
雲氣夜蟠雄劍紫
天光寒入舊羶青
不同嘉樹生南國
猶夢鯢魚化北溟

老我歸田有龍具僅堪供卧讀牛經

同誼書記游查山留題淨無餘西南林壑

地湧叢林小翠屏海吞孤嶂半螺青巖扉老衲忘人我
石甃神丹護甲丁吳甸土寒黃耳魄秦山草歇白蛇腥
放歌適在風埃表幢節浮空若下聽

辛酉雜題

一作古懷

二首

遺經姑置楚包茅新筆恭書蠱上爻利盡島溟珠象郡
道湮鄒魯鳳麟郊看雲

杖名

暮影齊巾角滴露

酒名

春聲落

枕凹自判優游不堪事鵲鳩添室翠分巢

是歲征雲南元梁王自縊

槿籬莎徑入林堂春作無牽午漏長音歇野鶯新綠淺
影浮潭鯽小紅香誰家數應中和節十畝寒輕二月霜
忍貫緼袍償酒債時人將謂獨醒狂

書西厦時洪武丙寅沿海築城

牀頭鴟卧久空金壁上蝸行尚有琴孺子成名狂阮籍
霸才無主老陳琳虹霓氣冠登萊市蝙蝠羣飛顧陸林
環海煙沙翻萬畝連村霜月抱孤衾

秋詞

香散天街靜玉珂露臺風殿夜如何星從河漢淡中落
秋在梧桐疎處多鸞影不曾離寶鑑蛛絲先已綴金梭
君王繭館詢遺事却擬鸞車共載過

書無題後凡三首偶感燕太子丹事

火流南斗紫垣虛芳草王孫思愴如淮潦浸天魚有帛
塞庭連雪鴈無書不同趙朔藏文祿終異秦嬰袒素車
漆女中心漫於邑杞民西望幾踟躕

塞空霜木抱猿雌
草暗江南罷射麇
秦地舊歸燕
質子瀛封曾畀宋
孤兒愁邊返照窺
牆榻夢裏驚塵喪
鞬觸莫識白翎終
曲語蛟龍雲雨發
無時

元世祖聽彈白翎
雀曰何其曲終有

凄怨之
聲乎

幾年新膽泣孤嬰
一夕南風馬角生
似見流星離斗分
謬傳靈武直咸京
九苞雛鳳沖霄翼
三匝慈烏落月情

縱少當時趙雲將
卧龍終始漢臣名

列朝詩曰洪武七
年遣元幼主之子

馬里達巴拉歸此詩記其事故有舊歸質子及南風馬
角之句太祖封瑪里達巴拉為崇禮侯故曰瀛封曾畀

宋孫
兒也

芮庠卿邀費孟彰同知陪酌背孰堂既同晚步口

號

罷酒出前楹霜寒著面輕林腰煙帛東天角火鋒生卧
木橋通野疎罨水隔城寬袍曳筇竹俱老愧宵征

題泖塔時主僧賢如愚不在

何年宰堵聳奇觀勢若蛟龍上糾盤秦縣赭衣淪鬼國

泖係先秦
因倦縣

梵家寶藏壓驚湍野瞻雨黑重燈夜天卧空

欽定四庫全書

元詩選初集
卷六十一

主

青一鏡寒欲買扁舟占漁戶老緣無力候衡官

甲子冬偶書

雲東亂定少新知江左書來有跛兒才盡罷為文自祭
醒狂寧要宙相隨天家青女催衣急漏水金人上箭遲
却喜故妻原上樹十年羈羽託深枝

乙丑秋書

腰痛非千米眊昏漸廢書靜知天運密老與堦程疎綠
吉黃甘外紅鮮白小初兒歸共貧樂容易歲云除

園館雜書二首

竹樹藏山石作門
魚砭水帶洗花痕
鶯聲又在鷄聲外
老不勝官只住村

殊鄉春色不曾濃
才力新兼病思慵
一枕清風聞格磔

半瓶香雪浸蓂蓉

香雪酒名



元詩選初集卷六十一